

欽定剿平三省邪匪方略

欽定剿平三省邪匪方略正編卷一百三十九

巳未年

十二月二十四日

丁未

松筠奏言

臣

欽奉

諭旨令將陝省漢中協副將改爲總兵移駐西鄉等

因一事悉心妥議具奏查西鄉爲漢中屏障守

西鄉卽以守漢中此守於堂奧不若守於門戶

之說也但門戶多則不能處處皆安重兵必擇

其居中扼要之地設立重鎮隱然有虎豹在山

之勢無論何處有警皆可往來策應方能有益  
漢中北通褒鳳保障秦中西達畧陽控扼甘肅  
西南寧羌爲蜀棧咽喉與保寧劍閣相聯絡東  
面洋縣爲駱谷要口與盩厔鄠縣相表裏自古  
以來皆爲重鎮從前川陝總督曾駐此地其後  
總兵駐於興安而漢中設協又有漢興道駐紮  
城中誠制馭之良規也今總兵設於西鄉漢興

道亦移該處滯於偏隅郡城重地僅恃都司微員儻他處有事則成鞭長莫及之勢矣

國家長治久安設官安泐當爲萬年之計教匪滋擾不過一時陝西外患豈必專在四川卽以通川要路言之數年來教匪有自寧羌入者有自南鄭入者有自褒城入者現在又自城固入矣是守西鄉亦未能屏蔽漢中也五郎爲終南山

內適中之地然山徑崎嶇土地寒瘠若設立重鎮則兵糧必取資外縣輓輸不易

臣

採訪衆謀

揆度全陝形勢竊謂陝省南境中通甘肅四川爲西南門戶商州通河南湖北爲東南門戶兩處皆屬要區舊制漢中有協商州有營而總兵駐劄興安居中以控制之聲勢聯絡本屬盡善無弊今承平日久生齒日繁川楚客民居之者

衆山地日開路徑愈紛自當隨時變通量爲增  
添以期久遠片愚以興漢鎮移於漢中而移漢  
中協於西鄉寧羌再增一協東西兩協爲漢中  
鎮之翼寧羌有協則陽平關漢鳳營遊擊亦陞爲叅  
畧陽遊擊移於陽平關漢鳳營遊擊亦陞爲叅  
將則漢中之四面固矣商州增立一鎮興安改  
鎮爲協與潼關協爲東西兩協爲商州鎮之翼

白河三面斗入楚境一面孤懸宜設一叅將鎮  
安四通五達入省衝途設立一叅將則商州之  
四面固矣五郎本屬西安查西安軍標副將新  
設於乾隆四十六年省城既有滿兵又有撫標  
似可移於五郎爲五郎協仍屬西安將軍管轄  
其兵亦以漸裁減陸續在五郎招募添補此外  
如平利之鎮坪宜設叅將屬興安協西鄉之大

巴山宜戎遊擊屬西鄉協洋縣之華陽山宜山  
宜設都司屬五郎協子午峪黑水峪等處酌增  
守備等小營歸於附近大營管轄東四二鎮互  
爲聲援而中有興安西鄉五郎三協以聯絡之  
外有寧羌潼關二協以護衛之漢興兵備道後  
駐興安始中控馭似於營伍地方均有裨益且  
四川提督駐劄成都有滿營軍標又有督撫標



達州緊要將來辦理善後或應移駐提督於達  
州距西鄉漁渡壩不過四五百里其勢可以相  
接鄖陽鎮駐劄竹山竹谿鄖陽府城僅有都司  
商州設鎮不獨固陝省之藩籬並可壯鄖陽之  
聲援川陝楚三省相爲犄角互星羅絲聯繩  
貫誠萬年久安長治之策也  
○增兩協查哈密  
協之宜統於該處辦事大臣哈密副將可斌

平番有城守尉帶領滿兵莊浪副將可裁其兵  
亦可酌減交都司管領所裁二缺即可移駐寧  
羌興安其餘新增叅將遊擊都司守備等官查  
陝甘沿邊一帶相距甚邇皆有營堡屢次抽撥  
官多兵少實爲冗員臣當細加查覈酌量撥補  
不必增添額缺再查乾隆四十六年議給綠營  
武官養廉所有名糧盡補實缺然將弁所得養

廉未嘗招募家丁其服役伴當仍係兵丁究屬  
有名無實臣請仍復名糧舊制以爲武官養贍  
家口之需停其所支養廉儘可充餉合數省計  
之不可勝用是無增兵之費而有增兵之實也

臣以賊匪將平籌辦善後事宜卽計慮及此但  
震之以威又當增置官師修明學校與教化厚  
風俗以成親親長長之治所有終南山及漢江

以南平利西鄉褒城等縣幅輿遼澗應添縣治  
之處容俟臣與台布往返札商同設鎮添兵事  
宜悉心妥議再行詳悉陳奏奏入得

旨原議大臣議奏

松筠又奏言竊臣行抵寧羌探得額勒登保追

賊至巴州通江等處德楞泰亦由西鄉前往東  
鄉開縣一帶追剿緣著名首逆均向南奔額勒

登保德楞泰不得不先其所急此外各股皆分竄陝省城固南鄭界外及西鄉境內西鄉西路股數尤多有高家營戴家營羅姓馬姓伍姓等名目先後奔衝大巴關虜坵子響水灘鍾家溝等卡隘經王文雄往返堵截幸保無虞賊匪退回川省復由潘家山老林翻城固之盤壩至南鄭之牟家壩

臣

前以寧羌安靜抽撥兵勇九百

名派副將韓加業遊擊崔德恒帶回沿江一帶  
韓加業聞信卽帶兵勇四百名前往法慈院堵  
其北竄道員文需署副將馬斌等分撥鄉勇於  
長林寨柳林鋪等處沿江嚴防

臣

卽兼程趕回

漢中據拏獲賊匪供稱該匪欲由沔縣黃沙過

江

臣

沿途於沔縣黃沙等處激勵鄉勇密爲布

置並派遊擊崔德恒帶兵五百名駐防黃沙猶

恐未足深恃復添派陽平關遊擊伊星阿都司  
馬良棟等令其管領原帶之兵四百餘名速赴  
沔縣一帶聯絡聲勢王文雄自西鄉之鍾家溝  
趕至高家嶺令遊擊梁煥等帶領兵勇千餘名  
由高堖子迎擊親率遊擊關聖保等帶兵迎至  
曹家壩適遇賊匪紛來兵勇奮力衝擊殺死執  
旗賊目二名賊匪數十人賊匪退回梅子壩正

在乘勝窮追而梁煥一路之兵突遇賊伏前後  
受攻王文雄趕回救應從東面山梁鎗礮壓下  
內外夾擊殺賊七百餘名重圍始解遊擊梁煥  
親司王來用守備劉耀德千總沈得榮李隨龍  
王國相皆身受重傷陣亡其餘弁兵鄉勇亦有  
傷亡者俟查明咨部請卹此股賊匪約有七八  
千人西竄紅廟堂黃官嶺一帶南鄭之花石梁



一卡亦被賊匪衝破通江之賊遂來會合漢江  
水淺處處可涉自柳林舖至沔縣二百餘里

臣

督飭文武設法布置防守現在雖未搶渡北竄

惟恐西奔甘肅王文雄帶兵力戰兼以焦急血

疾復作

臣

親至其營面爲撫慰並激勵將士卽

口仍趕赴前途追剿賊匪西趨甘省若嘉陵江

不能西渡必北入畧陽至上遊竄入徽成一帶

臣已飛札道員瑞亨帶兵至徽縣堵截如賊匪

果向西趨臣亦馳至畧陽八渡山扼其要隘惟

王文雄既已帶兵西來西鄉並無一兵東路一

股賊匪逼近漢陰石泉江岸屢次搶渡經署通

判高藍珍等督率兵勇奮力擊退而賊匪總未

遠去尙在南岸游奕且恐太平通江尙有續至

之賊查紫陽境內額勒亨額帶兵往來江岸防

守嚴密似可無虞

臣

飛札柯藩速帶原兵由紫

陽至漢陰石泉剿辦此股賊匪並飛咨經畧叅

贊速撥鎮將分赴寧羌西鄉會剿其竄入陝境

平利之賊前次係辛聰朱魘子等一股業經逼

回川境此次係徐方德一股有總兵慶溥與道

員溫承惠兩路截剿無虞深入至張漢湖餘黨

現在分爲三股兩股先後由五郎窰至鎮安經

兵勇截回竄入洵陽副都統綸布春岱森保等  
往來竭力追剿一股由整屋鄆縣竄回洋縣境  
內那彥成同恒瑞台布躡蹤緊追雖各有斬獲  
而急切未能蕝事緣賊匪以老林爲藏身之地  
總不打仗一見官兵卽逃入深林藏匿以致尙

稽時日再王文雄自九月以來染患嘔血病症  
力疾奔馳至今時發時愈日久恐難支持臣現

在督飭防禦如賊果西趨卽當趕赴甘省邊境

設法堵截不能兼顧漢中數百里之內全賴王

文雄一人儻病中精神不能周到所關匪細臣

處並無領兵大員柯藩慶溥俱有防堵責任未

便檄調查京州鎮總兵長春前隨明亮德楞泰

軍營於興安漢中情形尙稱熟悉現隨那彥成

一路剿賊該處帶兵之員尙多臣已札商那彥

成師飭令長春趕赴王文雄營中幫同帶兵剿  
賊庶保無虞又那彥成因聞賊匪西竄甘境已  
飭防守棧道之總兵索費英阿吉蘭泰帶兵赴  
徽縣畧陽一帶防堵札會到 臣隨飛催該二  
鎮趕赴畧陽之八渡山一帶嚴行堵禦奏入

上命軍機大臣傳諭那彥成松筠恒瑞台布曰據松  
筠奏陝省各路堵剿情形覽奏殊爲厯念那彥成

係朕特派辦理陝省賊匪伊至軍營卽以前次帶  
兵各員於賊匪竄入老林後遂不復窮追那彥成  
力矯其弊親自督兵深入老林以此爲盡心剿賊  
其實自趨拙路又總兵索費英阿吉蘭泰二人本  
在甘境防賊前經那彥成調令防守北棧甘境守  
禦未免空虛其張漢潮股內餘匪由老林向東竄  
逸那彥成帶領各兵爲所牽綴以致川境之賊探

知陝省重兵全在老林又聞甘境防守兵單或竟彼此勾結商議引誘那彥成之兵向東並乘甘省無備糾衆西竄俾官兵猝難兼顧而老林內賊匪又可乘間奔逸此皆那彥成調度失宜所致行軍貴知彼知己那彥成何見不及此耶現在那彥成同叵瑞台布由盩厔鄠縣洋縣躡蹤追剿並經那彥成飭令防守棧道之總兵索費英阿吉蘭泰帶



兵赴徽縣畧陽一帶防堵伊二人本在甘省防賊  
似此往來檄調成何事體現在那彥成等所辦止  
係張漢潮餘黨內之一股那彥成一路帶領多兵  
不值以全力剿此敗竄之賊此時川省賊匪竄近  
甘省那彥成所帶吉林官兵如尙未撥往川省卽  
當同恒瑞扎克塔爾率領此項勁兵並酌量添帶  
兵力速赴徽縣一帶堵剿竄匪勿令深入甘境至

張漢潮餘黨專交台布同岱森保帶兵追剿台布  
係本省巡撫卽責令在陝境將此股賊匪剿盡那  
彥成務將甘境之賊上緊截回跟蹤奮剿若賊匪  
仍折回川省那彥成亦卽帶兵赴川協力剿辦總  
之在川在陝同一剿賊惟當無分畛域方可期迅  
速蒞功現在甘境本未設有糧臺若令賊匪久在  
該處或更擾及未經被賊之區辦理更爲費手倘

賊折回陝境該省兵餉足資辦理然總不若將賊  
匪逼回川省并力合擊較爲得手也那彥成前次  
旣調度不善此次務當倍加奮勵上緊截剿不可  
稍有紆緩若賊匪折回川境那彥成更不可因賊  
已離陝遂置不顧必當步步緊追不予以暇卽合  
布等剿辦張漢潮餘匪亦當緊躡賊蹤悉力剿辦  
勿令殘敗之賊稍留餘孽至那彥成與額勒登保

均應剿賊之寄總宜同心協力勉副委任那彥成諒不肯因係阿桂之孫存不爲人下之見也至松

筠摺內稱王文雄現已帶兵西來西鄉無兵防堵賊匪逼近漢陰石泉江岸屢次搶渡俱被兵勇擊退尙在南岸遊奕且恐太平通江尙有續至之賊已飛札柯藩速帶原兵至漢陰石泉剿辦並飛咨額勒登保德楞泰速撥鎮將會剿松筠惟當嚴飭

防守江岸之鎮道等務各實力防堵毋令賊匪偷  
渡總兵索費英阿吉蘭泰現已回至甘省並著松  
筠飭令認真堵截勿令賊匪深入至王文雄帶兵  
力戰兼以焦急血疾復作實堪憐憫現在會石調  
愈深爲屢念此時調派長春趕至王文雄營中幫  
同剿賊所辦甚是該處既有長春幫同帶兵則王  
文雄在後營畧加調養俟血疾就痊再督兵向前

亦無不可所有受傷陣亡之遊擊梁煥都司王來  
用守備劉耀德千總沈得榮李隨龍王國相俱著  
咨部議卹

上又命軍機大臣傳諭額勒登保曰本日松筠奏到  
陝省各路堵剿情形其分竄陝省城固南鄭西鄉  
賊匪股數甚多雖經王文雄堵截退回四川復由  
老林翻至城固南鄭一帶欲從沔縣過江經松筠

於沿江密爲布置遊擊梁煥等於高埡子等處奮力衝擊王文雄亦卽趕回來攻殺賊七百餘名但賊匪竟有七八千人西竄紅廟堂一帶衝破花石梁卡隘與通江之賊會合該匪西竄甘省若不能踰渡嘉陵江卽恐北竄畧陽繞赴上游闖入徽成一帶甚關緊要額勒登保自任經畧以來於各路打仗殺賊情形俱能從實奏報一洗從前粉飾積

習且伊專擇緊要之賊自行剿辦賊匪竄至何處  
卽緊躡追擊不予以暇較之勒保之惟知安坐達  
州者實爲遠勝惟前此所稱各股賊匪前後遇兵  
剿殺勢已窮蹙之語殊非確實未免有意寬慰朕  
懷若賊匪果已窮蹙此次竄入陝境之賊何以竟  
有七八千人肆行衝突所謂窮蹙非謊言乎若如  
此虛言以爲寬慰轉增朕之憂悶矣况松筠摺內



既稱有七八千人並恐不止此數此股賊匪額勒  
登保係派何人在彼剿辦既不能預先攔截及至  
竄入城固南鄭地方又並不帶兵親躡賊蹤實屬  
玩悞著額勒登保查明如有縱賊情事一面嚴叅  
一面拏問以肅軍紀至額勒登保身為經畧於川  
楚陝甘各處軍務俱當通盤籌畫若止剿辦四川  
賊匪則與四川帶兵之員何異且通江西鄉各股

賊匪在彼遊奕已久額勒登保早應設法籌辦乃  
派交不得其人以致賊匪闖入陝境並欲竄往甘  
肅不但未經蹂躪地方遭其焚掠而賊匪又得搶  
獲糧食襲脅平民其勢復張况甘省一帶未設糧  
臺倘經竄往辦理更爲棘手額勒登保於此一節  
未免稍存畛域大不是矣豈將川省賊匪驅至他  
境卽爲戩事乎此時賊匪旣已會合竄至南鄭並

恐川省太平通江之賊復有接續竄來者且西鄉一帶爲川陝要路現據松筠奏稱該處並無一兵著額勒登保速派得力將弁酌帶官兵前赴該處實力堵剿不可再任續至之賊竄往陝省總之賊匪奔竄之路旣有阻遏於前必須緊躡於後方可成夾擊之勢若後無追兵賊匪得以從容奔逸無所顧忌如遇追剿緊要之時不但帶兵將領必當

越境跟蹤卽額勒登保亦應隨賊所向奮力殲擒  
若以川兵赴陝恐該省糧餉不能接濟朕已諭令  
松筠不拘何省官兵追賊到陝總當隨地支應額  
勒登保更不必顧慮及此也再川省帶兵大員德  
楞泰能到處緊追賊匪不遺餘力卽朱射斗等亦  
頗知奮勇惟聞提督七十五近來不甚出力前因  
七十五兩次派員赴楚防禦並不親往剿賊近又

集字彙編 卷之五 欽奉  
駐守夔州皆其明証額勒登保如查明七十五果  
有逗遛避賊之事卽當將七十五革職鎖拏交與  
魁倫審擬具奏不可稍事姑容也

同日魁倫奏言

臣 欽奉

諭旨魁倫係四川總督現駐達州於軍營一切情形  
自當隨時核有稟報等因伏查 臣 抵川以來額勒  
登保帶兵總在巴州通江南江廣元東鄉太平

一帶往來剿擊現由儀隴所屬之大樹壩前進  
德楞泰先由楚境竹山追賊入陝之西鄉縣境  
嗣即由陝入川之廣元縣境繼復由川至陝之  
西鄉現復由陝入川在太平開縣一帶追剿均  
在臣所駐達州之北約數百里及千餘里不等  
迨臣接據文報時額勒登保等均已就近先行  
馳奏臣處逐日差人分路探聽額勒登保等追

剿賊匪每日移營並無一定之處遇賊卽行打  
仗實爲不辭勞瘁其打仗情形殺賊名數核與  
咨送摺稿內所報均屬相符並無粉飾卽各路  
帶兵大員亦大加振作不敢觀望遷延虛捏謊  
報從前軍營種種積習均已改變一新臣愚昧  
之見軍紀現旣修明奏報從實臣若僅據額勒  
登保等所來文報遇便摭拾具奏恐蹈敷衍塞

賣之咎是以不取煩瀆贅陳尙事關緊要如各路領兵之員或有仍踵從前積習並虛捏冒功之處即當立行據實叅奏斷不代爲徇隱至現在賊匪情形已爲窮蹙每遇官兵不敢接仗輒行竄入深林或翻山逃遁爲苟延殘喘之計因川省居民多已結寨守禦難以搶掠屢次由東北邊境竄入楚陝地方叠經官兵堵禦仍折回



川然川省邊境綿長山林叢雜路徑紛歧處處  
可通楚陝且官兵逐日追賊日行百里數十里  
未免力疲而賊匪捨命竄突情同困獸卽如額  
勒登保於蒼溪縣屬之貓兒埡青字埡等處遇  
冉添元王登廷等大股賊匪我兵將賊匪圍逼  
甚緊賊勢無路可逃遂分股捨死衝突致將備  
兵丁多有折傷而賊匪亦經我兵斬戮無算所

以首逆王登廷隻身奔逃爲南江縣鄉團人等  
拏獲該犯於諸首逆中最稱狡黠業已生擒餘  
逆自當膽落現屆冰雪返寒之際如果賊匪無  
可掠食其勢更當自潰查各股賊匪屢經官兵  
剿擊或別爲一股他竄或於分散之後仍復合  
夥勢本無常而各首逆姓名或經久潛匿不見  
或另行改易詭名亦復飄忽靡定除王登廷現

已生擒外冉添元及王登廷敗竄餘衆額勒登保現由儀隴之大樹壩追至巴州一帶剿捕鮮大川苟文明等股被額勒登保剿散後卽由東鄉太平一帶逃竄現有朱射斗一路官兵在彼兜剿又聞該匪等與樊人傑徐添德等合夥同竄復經德楞泰躡蹤追趕太平開縣一帶剿辦其張子聰雷思旺等股由楚境折回復由大寧

一帶奔竄現有七十五李紹祖等追剿總不使

賊匪闖入楚陝地方臣會同廣興辦理糧餉一

切熟察輕重緩急情形隨時核辦所有官兵支

領餉項俱經立定章程斟酌妥善以杜影射浮

濫之弊鄉勇一項查明各州縣相距賊氛遠近

陸續或撤或存而附近楚陝邊界現在防賊竄

逸有應行添募之處均已酌量添雇以資防堵

居民糧食牲畜令皆屯貯寨內以絕賊糧其應  
行籌辦諸務臣尤隨時隨事悉心妥備不敢稍  
有貽悞奏入

上命軍機大臣傳諭魁倫曰據魁倫奏川省剿捕情  
形並聲明永將各路奏報賊情重複具奏緣由所  
見甚是魁倫係該省總督各路打仗情形地方官  
自必隨時稟報該督斷無不知之理如各路帶兵

之員或尙有虛捏謊報之處魁倫當卽據實參奏  
不可代爲徇隱至摺內所稱諭令居民將糧食牲  
畜等物盡行屯貯寨內以杜賊匪搶掠所辦亦是  
現在賊匪奔竄無糧可掠自不難以次殲除果能  
於兩三月內蕪功卽所深願惟摺內稱賊勢窮蹙  
之語尙係寬慰朕懷未爲確實在賊匪之竄至  
陝境者已有七八千人尙得謂之窮蹙乎再本日

據松筠覆奏移駐鎮道摺內有四川提督請移駐  
達州之語四川提督駐劄成都原以控制金川及  
西藏等處若移駐達州轉覺偏於一處雖就目下  
情形而論達州自屬緊要將來賊匪剿淨後該處  
地方卽屬寧謐何必將提督大員移駐該處轉致  
成都重地無所彈壓况松筠摺內稱西鄉爲漢中  
之屏障若將總兵移駐西鄉則郡城難資控馭試

思成都係省會重地關係尤爲緊要豈可轉將提督移駐達州且達州與西鄉接壤西鄉之不宜移駐總兵卽猶達州之不宜移駐提督也現將松筠奏到之摺交原議大臣議奏松筠係陝甘總督川省情形自未深悉魁倫係四川總督於該省地方險要及一切控制機宜自當確有所見著魁倫將松筠所請移駐提督一節悉心察核是否可行之



處據實具奏

同日魁倫廣興奏言竊

臣

等奏叅同知那山奉

委平兌陝省餉銀短平一案欽奉

諭旨福寧之有心朦混勒保之意存推諉均有應得  
之罪那山著解任交與魁倫會同廣興歸案質審

除勒保業經解京應由部臣查訊外

臣

等當提

那山將該員前往廣元接餉之時與陝省解員

如何交代是否原原原解有無中途侵盜情弊  
其所稱因值賊警借用市平比兌之處是否實  
情逐一向其確究據那山供稱奉委接收京餉  
於上年十二月內在廣元縣神宜驛地方隸陝  
省委員知縣鄧純等八起解到銀二百五十萬  
兩每起限同解員抽出十餘匣用庫碼比兌或  
九六平或九六八平不等當經照依原平填給

收受並通稟在案本年三月間往陝省同知李  
景蓮解還前借川餉四十萬兩亦卽眼同解員  
開匣點驗係屬零星錠件正用庫碼比兌間適  
聞賊匪竄近神宣驛一帶居民驚惶躲避隨與  
解員相商運赴廣元縣城彈兌該員以神宣驛  
已係四川交界不肯同赴縣城因卽在該驛比  
兌而所帶庫碼止有一百兩大碼一個並無零

星小碼一時實難兌完恐有疎虞是以向各舖  
借用市平彈兌緣市平大碼雖用庫碼較準但  
餉銀錠件零星不能一比合式必須添用市平  
小碼配搭以致平頭間有參差實因彼時倉惶  
疎忽並不慮及市平小碼輕重不一隨即分撥  
解赴各局致與稟內銀數不符此係眼同解員  
接收餉銀實在情形並無絲毫弊竇亦不敢稍

有捏飾臣等查此項銀兩既係那山短少應卽

著落賠繳何以該局道員詳報輒請量予寬免

面詎石作瑞據供此項餉銀四十萬兩當時分

撥達州保寧成都三局各局平兌俱比那山所

報接收短少之數更有短少合計共短平七百

九十餘兩奉前任經畧批令一併行查旋據那

山稟覆實因賊匪逼近惟恐疎失借用市平勿

忙比兌以致平頭間有高低因查該員實因賊  
警忙迫之故尙無侵吞入己情弊所以將可否  
免賠之處據實詳請各憲批示並非有心代爲  
開脫查接收餉銀理應詳慎小心乃那山於接  
收平兌陝省解到餉銀雖訊據彼時適聞賊匪  
竄近之信借用舖戶市平幫兌致有參差然究  
於餉項不能慎重辦理草率咎實難解除所短

銀七百九十八兩零著落照數賠繳外請

旨仍將那山交部議處石作瑞係總理局員率將寬免賠繳詳請顯係徇庇亦有應得之咎該員已於曹庠業剋扣平餘案內革審現經<sub>臣</sub>等嚴行確訊應俟定案日一併核擬奏入

上諭內閣曰此項銀兩由陝解川那山係經手接收之員率用舖戶市平幫兌致有參差雖訊無侵蝕

入已情弊而於餉項不能慎重辦理咎實難辭所  
有短平銀七百九十八兩零卽著落那山照數賠  
繳外仍將該員交部議處

二十六日 己酉 德楞泰奏言 上 前將鮮大川苟文

明等股賊匪截剿東奔隨即躡蹤追擊沿途且  
有擒獲據獲犯僉供該逆欲赴川東無兵處所  
冀延殘喘查川東一帶甫經安撫且大兵盡在



西北再經擄掠賊勢又必復熾該匪惟恃狂奔  
日行百里以外臣緊跟賊蹤旋轉於深山箐林

之內茲於十一日趕抵雞鳴寺正值大雪該逆  
等見官兵已至卽竄上大面坡老山之一窩絲  
油榨坪等處臣於是夜四鼓帶兵冒雪步行而

進路徑險仄冰凌滑溜馬匹間有跌斃者十二  
日已刻行抵一窩絲趕上賊尾我兵奮力剿殺

立斃賊匪二十餘人匪衆膽敢下壓官兵併力  
攻撲卽時將油榨坪搶上又殺賊二百餘人生  
擒張成有等二十四名逆匪敗上貓兒梁箐林  
道路愈仄冰雪愈大更有積木攔架兵力不能  
施展臣與賽冲阿温春並各領隊鎮將等親率  
步兵追出箐林之馬家營又殺賊二十餘人賊  
匪卽由關口坪炸金壩漏夜奔逃所獲各犯當

卽分別辦理旋據哨探度向瑤帶餘匪三百餘  
人由右手桐油坪遁入東鄉界內提臣七十五  
現已追賊在東關一帶卽飛咨令其就近迎剿  
而鮮苟二逆現竄雲陽之謝家壩一路或入雲  
萬或赴奉大均未可定臣擬卽選兵輕騎窮追  
鮮苟二逆以冀迅速擒捕再川陝邊界一帶尙  
有賊匪游奕查西鄉堰口等處行王文雄駐彼

防堵近復添派山西兵丁二千聲勢甚盛紫陽  
等處有總兵柯藩近又有額勒亨額帶

盛京勁旅一千在彼防堵更爲得力平利一帶有

慶溥溫承惠帶領兵勇扼要堵截松筠現又親  
帶官兵在漢陰防禦尤爲妥協似此佈置嚴緊

江岸實可無虞臣俟將鮮苟二逆擒掃後察看

賊匪情形何處緊要卽移師前往剿辦至此大

集賢堂  
三

打仗陣亡受傷兵勇十數各容俟查明咨部辦理再遵查王廷詔一犯籍隸襄陽又名王大淑與齊王氏姚之富李淑高均德等同時起事逆齊姚伏誅該逆遂率夥黨數百人周流於川楚陝各股賊營之內而各首逆無不俯首奉教待以父師之禮蓋緣已死逆兄王廷章首先捏創邪教自齊姚二逆以及三省各股首逆半屬徒

輩是以該逆各分最大如傳授羅其清經圖代

爲高均德改名皆係聽其指使其蠱惑人心又

爲各首逆中之渠魁臣前於箕山剿辦羅其清

及麻壩寨殲除冉文儔時該逆俱附其黨迨後

進剿各逆臣留心查訊卽未有供出王廷詔之

人茲於舊司河大壩關截剿張添倫張士龍等

擒獲傳教首逆劉學仁訊據該犯供稱王廷詔

現帶不過百餘人附合張士龍張士虎夥內是  
以將王廷詔一併敎入摺內嗣後平河空水河  
及寬灘河野人村等處連次剿除各股所擒活  
賊千數百人其中卽無該逆匪黨亦未有供稱  
者諒彼時經官兵痛剿不能北竄或仍附張士  
龍股內或又遁入另股遠颺均未可定第該逆  
逃竄總不出現在各股之中臣帶兵遇賊卽剿

無論首逆夥黨惟期盡絕根株諒該逆斷難漏網奏入

上命軍機大臣傳諭那彥成德楞泰曰德楞泰一路軍營打仗情形久未據伊奏報朕盼望已有月餘時深屢念乃本日奏到之摺並未痛剿賊匪止將官兵追逐情形摘入聲敘而殲賊又不過一百餘人閱之殊不愜意想德楞泰因具摺恭賀元旦不



得不將軍務情形附奏塞責殊不知朕因軍務未竣宵旰焦勞更有何心披閱元旦賀摺現在

皇考大事二十七月以內一切慶賀典禮俱經停止德

楞泰惟知具摺稱賀並無軍營捷音何不曉事若

此前次德楞泰本在川北剿辦賊匪今又稱鮮苟

二逆竄往川東伊卽馳往窮追顯有避重就輕之

意仍蹈從前軍營奏報粉飾惡習昨據松筠奏川

省賊匪約有七八千人竄入陝西西鄉境內自卽  
係德楞泰前次所勦之賊德楞泰並不限蹤至陝  
舍之東去非避賊而何昨因此股賊匪竄近甘境  
諭令那彥成帶兵速赴徽縣一帶堵勦著德楞泰  
卽迅速馳往徽縣一帶與那彥成併力截剿若能  
一鼓殲除固屬甚善否則仍當逼回川境以便官  
兵會合勦辦斷不可令其深入甘境總之川省各

朱添全亦係傳教首犯當一體嚴拿但賊匪詭詐  
百端經官兵追捕緊急往往改易姓名潛行竄匿  
不可不隨時查訪務獲正犯勿任漏網

同日

上命軍機大臣傳諭魁倫額勒登保曰本日托津回  
京召見時詢問軍務情形據稱四川百姓向屬富  
庶現已於險要山頂砌築堡寨將所有糧食等項

盡數存貯堡內賊匪無從搶掠時形飢困所以四  
川賊匪俱欲竄往陝省現在川省賊匪節經官兵  
剿捕從賊之人愈形畏懼不肯附從是以賊匪比  
前較少而各處地方卡隘仍前安設如昭化南部  
蓬州皆在嘉陵江之右賊匪因有此江阻隔不能  
竄往江右百姓未被蹂躪現在安堵如故所有昭  
化南部等處守城兵勇未免虛設應移至緊要之

處防堵如巴州一帶東通太平西界廣元約有一千五六百里賊匪東西奔竄往來無定若徒事追逐未免疲我兵力現在駐劄廣元縣之保寧府知府德福因廣元東一百餘里爲百丈關該處並無關口有兵一千名在彼防守離百丈關數十里爲木門廠在兩山之間形勢扼要德福稟請額勒登保魁倫將百丈關之兵一千名移駐木門廠防堵

魁倫以德福所稟爲是已札知額勒登保酌辦所  
奏自係實在情形何以魁倫並未及早籌計及此  
魁倫係四川總督雖不責以打仗殺賊之事但一  
切調度及防堵事宜係其專責何得以有用之兵  
置之無用之地卽如廣元縣木門廠地方形勢旣  
屬險要自應將安設百丈關之兵移駐該處防堵  
更爲得力其昭化南部蓬州等處兵勇亦應照此

挪移緊要之處方足以資堵剿總之賊匪向東則  
西邊離賊較遠該處守卡兵勇卽應向東挪移賊  
匪向西則東邊離賊較遠卽應將該處兵勇向西  
挪移步步緊逼賊蹤使賊匪不能仍前四散奔竄  
則不特兵勇之勢日聚聲息相通彼此可資援應  
卽剿賊官兵亦可省往來追擊之力此外如有此  
等情形應行通變之處魁倫必當隨時相度形勢

酌量妥爲布置並著額勒登保一體留心會商派撥總須將各股賊匪愈逼愈緊不使各處漫散務於明年二三月以前悉數剿淨方爲妥善若再遲延一交夏令則雨水甚多山徑泥濘且賊匪又可到處掠取田中食物辦理更爲棘手魁倫係該處總督地方是其專責不可不上緊籌辦以期迅速成功也



欽定剿平三省邪匪方略正編卷一百四十 巳未年

十二月二十七日庚戌額勒登保奏言查再添元

等賊衆自圍中邊界折奔巴州境內臣亟思殲

盡此股隨率同阿哈保格布舍楊遇春穆克登  
布等分合緊剿旬日之內追逐一千數百餘里

疊次於花叢埡土地埡老觀廟廐背梁黃陳寨  
一帶共計斬獲賊匪八十餘人無如我兵抄在

賊前賊又轉而向後我兵兩頭截擊賊又向旁  
路奔逃仍未殲滅此股昨又生擒探馬頭向有  
聲朱得貴二名向有聲係徐添德股內匪徒因  
行走落後與朱得貴同爲冉添元探聽官兵消  
息並據僉供冉添元近將買賣人擄去問知王  
登廷已擊到軍營冉添元說又去了一個幫手  
我等終亦難望生全祇可鬧一日是一日今賊

匪到處不得糧食祇遇著民人趕場擄掠喫食  
大寨人多處所亦不敢去見有小寨聲言要破  
寨子寨上擲些米糧下來就走官兵追得緊又  
復丟棄連夜逃命有時還假充官兵亦不用白  
布包頭餘無要供當將該犯等一併正法該匪  
等又從東鄉之雙和場後坪轉向太平交界之  
團包梁寶平寺等處漏夜逃竄

臣現卽趕緊進

擊近據七十五報稱該提督本在大寧之寶塔  
一路堵剿張子聰等竄匪接准倭什布來咨前  
月十五日夜辛聰一股賊匪由陝之鎮坪攻撲  
楚境馬鞍山營盤七十五卽同總兵李紹祖帶  
兵由徐家壩趕去截剿並期與楚省官兵夾擊  
仍留叅將伊爾泰都司夏雲龍等帶兵一千餘  
各在一碗泉紅池壩等處防截賊之竄楚別路

臣現已飭知七十五等務須趕緊兜剿且聞李

聰股匪無多卽或一時不能剿淨自可截回川

省臣並以七十五等已往楚界其大寧之寶塔

等處未免空虛查將軍阿迪斯於上月十三日

已抵達州因臣剿賊無定未得來營今大寧一

路正在緊要卽飛咨阿迪斯帶領滿漢屯土官

兵六百餘名徑由達州前赴大寧督辦與該處

原有官兵協同堵剿又接據朱射斗呈報該鎮  
近由黃龍背追賊至通江之壩溪保兒壩一帶  
賊又竄至陳家峽轉入南江地界並稱所追之  
賊係張添倫股匪臣以賊匪竄至南江恐又逼  
近陝省之南鄭一帶朱射斗所帶馬步官兵約  
有五千餘名已飛飭該鎮卽將該匪於川境趕  
緊剿洗斷不可使之向西北竄逸至德楞秦前

由平溪壩筒池壩追剿徐添德鮮大川等股賊  
匪至陝之西鄉在安子溝安子坪等處殺賊一  
百餘人生擒三十餘人該匪又竄入老林遁赴  
漁渡壩鹽廠一帶折回四川之太平德楞秦現  
由城口一路剿辦查此時各路賊匪節經官兵  
剿殺或一股分爲數股或數股又合爲一股合  
則多至二三千人分則少祇三五百人賊勢殘

敗更甚於前而所恃以苟延殘喘者惟在亡命  
急走其狡獪情形到處亦復相等今臣督兵在

川之北德楞泰在川之東而七十五李紹祖在

川楚邊界朱射斗在通江地界阿迪斯又卽赴

川東之大寧各路俱有官兵臣與德楞泰相距

雖遠而彼此信息常通倘於此數日內臣與德

楞泰等再能痛殲一二股賊匪則蕞事卽有可



望况那彥成所勦張逆餘匪一經完竣自必卽  
日移師由陝省邊界入川軍聲益壯更無難尅  
日蕙功再臣將逆犯王登廷提到軍營率同隨  
營道員李鉉詳加鞫訊雖據該犯堅供從前並  
未習教實因達州知州戴如煌遍拏邪教受累  
不堪故爾起事然該犯膽敢糾合徐添德等拒  
捕戕官歷久抗拒官兵毒害良民實屬罪大惡

皇朝通志卷之三  
五  
極謹繕該犯供單呈

覽並將該犯解赴保寧監禁恭候

諭旨遵辦再軍功維全董學海先因帶領鄉勇得力  
會給有頂戴茲各賞加六品頂戴又首先盤詰  
王登廷實係鄉勇向文繡難民張順貴隨後認  
出除賞給向文繡銀四十兩外並給予八品頂  
戴張順貴年功賞銀二十兩其餘在事鄉勇李

陞楊浩劉正邦張朋均係鄉愚每人各酌賞銀  
十兩以示鼓勵

額勒登保又奏言查辦理軍務例無賞需臣從

前隨福康安等在臺灣廓爾喀苗疆出師福康

安等凡於出力之人多有賞資迨苗疆事竣臣

前往楚省黃柏山剿辦覃加耀等賊匪旋又自

楚赴陝復由陝至楚俱係各自領兵遇有將弁

等奮勇殺賊割獻首級耳記及差本地民人踴  
探路徑等均有不得不隨時賞給銀兩之處

臣

所得分例無多不能自出已資各該省均有道  
府等官隨營辦理糧餉所有用項係該員等支  
發上年八月來至川省剿辦各股逆賊所有賞  
項亦卽於糧員處提用本擬於事竣後移交魁

倫辦理茲蒙

皇上體恤周至特

頒給賞項一萬兩當此剿賊緊急之際臣藉資賞給

更可鼓勵戎行剋期蕩事謹將支用賞項開單

呈

覽奏入

上命軍機大臣傳諭額勒登保曰額勒登保奏拏獲探馬頭向有聲等訊據供稱賊匪窮蹙情形看來

該處賊匪屢經官兵追剿輾轉逃竄口食缺乏自  
係實情其小寨中人數較少恐賊匪攻破卽擲與  
米糧自因寡不敵衆計圖保護堡寨起見但此等  
窮竄匪徒無食可掠官兵正可乘勢殲除若民人  
等因畏懼賊勢擲與口食豈不轉資盜糧現在正  
須鄉勇嚴行堵剿之時此事固未便遽行查辦但  
亦當曉諭民人等各宜固守本寨悉力禦賊不可

心存畏懼輕以糧米擲給賊匪方可收剿捕之效  
至七十五本在大寧地方堵剿因接楚省咨會卽  
回總兵李紹祖截剿辛聰一股所辦未免畧遲額  
勒登保惟當飭令該提督上緊前進與楚省官兵  
夾擊將辛聰一股速行剿盡不得再有延玩干咎  
至所奏德楞泰追剿賊匪再能痛殲一二股蕝事  
卽可有望那彥成所剿張逆餘匪一經完竣亦可

移師入川軍聲益壯等語那彥成追剿張逆餘匪  
已閱多時惟事入林搜捕總未能痛加剿殺看來  
竟不足恃現因川省賊匪竄入陝境有前往甘境  
之勢已令那彥成帶兵速赴徽縣一帶堵剿並令  
德楞泰馳往會同截擊但昨旨到後恐賊情又有  
不同或此股竄匪又已截回川省則德楞泰又可  
毋須前往不可稍存拘泥若德楞泰必須前赴徽



縣協剿其原迫之各股賊匪卽當另派妥員速往  
接辦不可又在賊匪因無人追剿復致他竄總在  
額勒登保斟酌機宜朕亦不爲造制額勒登保平  
日操守廉潔不辭勞瘁奮勇出力朕所深知惟於  
一切調度無分畛域之處尙未能熟籌妥善伊身  
任經畧毋論川陝楚各省軍務皆當悉心經理必  
須處處堵剿有人方爲不負任使朕於新正初一

日即當親詣

裕陵行初週年禮計自親政以來辦理軍務已經一載

帶兵各員因猶疲玩朕於恭詞

裕陵時又將何詞默奏仰慰

皇考在天之靈實深引以為罪不知額勒登保等亦各

知慚悚否總之剿捕一事務於明年二三月以前

將各股賊匪一律辦盡石運至夏令青苗長發賊

匪又得麪處掠食且雨水較多路徑泥濘辦理更  
爲費手惟在伊等激發天良剋期蒞積朕自必加  
之恩賞倘此次訓誨之後仍前延玩則是觸朕之  
怒自蹈罪愆本日永保明亮等俱已解到其作何  
治罪之處額勒登保自必聞知卽伊等前車之鑒  
不可不慎也至額勒登保覆奏願給賞項一節向  
來軍營本無此項賞需皆係福康安作俑今因行

之曰人該兵丁等竟視爲例所應得是以仍行頒  
給雖額勒登保清操有素自可信其無侵冒等弊  
但亦須核實賞給博節動用不可稍有浮濫

二十九日

壬子

那彥成恒瑞台布奏言查賊匪往

來奔竄多在五郎洋縣蓋屋所屬地方

臣

等公

同商酌必須將賊匪逼出老林兵力方能施展  
隨派副都統扎克塔爾總兵觀祥等自小王洞

至龍草坪復派副將多爾濟扎普叅將游棟雲  
等自板房溝至麻房營俱從嶺北逼剿副都統  
綸布春桑吉斯塔爾等分路在嶺南逼剿臣等  
帶領總兵疑德叅將蕭福祿等分布兵勇在賊  
匪西面以杜折竄之路多爾濟扎普在板房溝  
遇賊自山梁壓下殺賊四名生擒十三名滾崖  
跌斃者甚多賊匪由獅子壩東竄其餘各股見

官兵逼剿緊急陸續竄出老林大股賊匪冉學  
勝奔據陡成巖上綸布春桑吉斯塔爾等帶兵  
仰攻三次該匪滾石抗拒我兵復奮力上撲將  
陡成巖奪據殺賊二十三名生擒七名上仁河  
鄉勇在獅子口復殺賊十二名賊匪隨分數股  
向東南洋山一帶奔竄該處鄉勇素稱勇健臣  
等前經飭令嚴防賊知有備遂竄向東北一帶

復經米糧川秋糧川鄉勇截殺八九十名容

臣

等查明出力鄉勇另加鼓勵查東北一帶已至

山陽所屬地方賊匪自出老林後翻山狂奔每

日夜必行一百四五十里各路官兵趕緊窮追

臣

等亦分中路北路督率追剿山陽山勢畧開

馬隊自能得力而東路各寨鄉勇義切同仇亦

皆認真剿賊惟山陽迤東南雒一帶可通豫境

賊匪奔竄甚捷必須前途堵截除一面分兵覓道兜截外仍一面飛咨吳熊光飭令堵禦邊界以昭嚴密

同日倭什布奏言臣前因界外尚有賊匪一股

屯聚陝省平利屬之鎮坪大小樹河一帶距楚省西面河最近當卽駐劄該處督率西溝石店河黑山頂等要隘將弁兵勇晝夜嚴防並聯絡



各卡梭巡會哨該匪不敢直前奔突遂往來游  
衍忽遠忽近意欲抄覓小道衝越當將幽僻山  
徑挖斷並於陝境通楚之要路亢喜坡文彩溝  
等處派撥弁兵酌添鄉勇設卡分守俾西面二  
律嚴密初七八等日賊人復在西溝外之烏巖  
水及黑山頂水岔各卡窺伺均經派防官弁率  
領兵勇施放鎗礮遏截退去初九日突至亢喜

坡左近焚掠因先一日兵勇齊集已於坡上紮  
卡該匪仍卽奔回大小樹河屯住旋據派防西  
北仙女巖之都司劉應世盤獲賊探王貴一名  
供稱此股係徐添德分出夥黨張洪榮爲首亦  
係襄陽人實在習教者祇有六七百人其餘俱  
係被裹之人昨令其探聽各卡何處兵少卽由  
何處奔入當將盤獲之兵優加賞勵

臣思該匪

屯擾二十餘日若非併力壓剿勢必另生譎計  
甚或愈肆鴟張而抽撥各卡兵勇又恐賊繞他  
處乘虛而入適據總兵慶溥帶兵來抵亢喜坡

臣

飛札商令由東北進擊並因山路多歧恐伊

兵力不敷分路兜剿隨派令遊擊曹星都司鄧  
興相等挑帶健勇官兵分派三路一由小樹河  
一由黃泥塌一由大樹河前進匪衆聞信卽從

甘溝地方向螞蝗壩一路南竄慶溥督同曹星等併力跟追沿途斃賊多名生擒陳正澂吳國儀二名賊見官兵各路並進勢難折竄遂由中心石走迴龍溪奔入川省太平屬之大魚河而去臣一面飛咨經畧額勒登保總督魁倫及七十五就近撥兵截剿並據慶溥札稱賊匪雖已驅歸川界相距尙近現與曹星等分布邊隘防

其復折俟該匪不能回竄再行撤歸原防處所  
又據探報前次折回大寧老觀子一股賊匪已  
由公坪貴壩竄入雲陽縣界內是楚省西南兩  
面現在均爲寧謐邊界一帶居民相率來歸其  
陳正滙吳國儀二犯供與王貴相符並訊係從  
逆日久均經先後辦理臣仍駐守西面河一帶  
督率防範並嚴飭各卡員弁仍前實力堵禦不

敢稍存弛懈再接據駐守鄖西邊隘道員恒慶稟稱陝省張逆餘匪由鎮安大仁河小河口等處東竄本月初十日繞至洵陽鄖西交界東川卡之鹽店地方經派防鄉勇併力迎堵互有傷損賊仍折回洵陽所屬之磨溝口雙河一帶屯聚與鄖境之趙家河朝陽溝等處均屬毗連現已會同武員並各帶兵勇分投相機遏截查此

股賊匪殘敗無多因被陝省官兵剿急妄希衝  
突入楚臣當卽飛飭恒慶及各干員弁認真嚴

密守禦毋令漏越一名仍審度賊勢若可乘其  
窮蹙卽與陝省官兵收兩面夾擊之益均奏入

上命軍機大臣傳諭那彥成恒瑞台布曰張逆餘匪  
竄入老林往來奔突那彥成等入林搜捕爲日已  
久並未大加剿殺所辦總不得要領節經降旨

諭示今那彥成等以此股賊匪必須逼出老林兵力方能施展乃賊已竄出老林而官兵分投截擊祇殺賊二三十名擒賊七名賊匪又向東南一帶翻山狂奔仍未能扼要堵截躡蹤痛剿所謂施展者安在看來賊匪竄匿老林後雖據那彥成等節次奏稱帶兵入林搜捕亦不過在老林中耽延時日並未跟蹤追剿卽此次賊匪竄出那彥成等亦



未必先有知覺因見賊匪業已翻山逸去卽以逼  
出老林爲辭試思此股竄匪餘匪如果能設法堵  
截則賊匪竄出時正可乘機擊剿今乃任其入林  
出林竄至山陽商雒一帶又可潛逼豫境且現據  
倭什布奏稱張逆餘匪復有一股由鎮安等處繞  
至洵陽鄖西交界勢將闖入楚境是那彥成等不  
但不能及早搜捕並將賊匪轟逸俾得竄至楚豫

邊界所辦何事那彥成等俱著傳旨嚴行申飭前  
因川省賊匪竄入陝境有前往甘肅之勢曾諭令  
那彥成同恒瑞等帶兵前赴徽縣一帶堵剿今看  
此情形那彥成一路距甘尙遠而老林竄出餘匪  
正當趕緊剿辦那彥成不必拘泥前旨卽赴徽縣  
捨近就遠轉致此股窮竄之賊剿捕不能得力兩  
相耽誤總在那彥成等審度賊情及道里遠近酌

量辦理剿賊機宜務步換形朕亦不爲遙制也

上又命軍機大臣傳諭倭什布曰倭什布奏協同陝省官兵將竄匪逼剿人川所辦俱好慶溥係陝省帶兵之員因剿賊至亢喜坡倭什布不分畛域卽添派官兵馳赴協剿賊匪不致竄入楚省甚合機宜惟據奏張逆餘匪由鎮安大仁河等處東竄復繞至洵陽鄖西一帶地方經兵勇併力迎堵仍折

回洵陽所屬之磨溝口屯聚此股賊匪殘敗無多  
因官兵剿急衝突入楚倭什布雖已將賊匪截回  
陝境尤當督率官兵嚴密守禦不可因賊已驅出  
本境卽稍存大意並當截其折竄之路兩面夾擊  
每辦一股務令悉數剿除方可云一股辦竣也

同日那彥成松筠台布又奏言剿蒙

發下條奏運糧剿賊事宜四款

命臣

等公同酌核具奏

臣

等詳加閱看內開修葺古

寨存貯軍糧卽在附近村莊採買運貯一款查

終南山內古寨久已無存

臣

等周歷山中並未

見有遺址現築堡寨多在高山之巔據險保聚

寨內居住老弱並無隙地可貯軍糧况官軍追

賊初無定向安得有如許軍糧處處分運存貯

至山中米麵甚少居民盡食包穀軍營供支糧

石亦不能在附近村莊採買應毋庸議又豎旗  
招撫資遣難民回籍一款奉

旨以臨陣招撫恐賊匪假裝難民混跡其中一時莫  
辨轉致墮其奸計仰見

皇上洞燭情僞訓諭明切所言斷不可行至逃出難  
民及隨時擒獲者訊明後給與路票回籍久經  
如此辦理亦毋庸再議又扼險設伏一款據稱

南山一帶處處皆平山複坡歧途四出惟五郎  
至華陽二百六十餘里兩山夾峙中有長溝一  
道左右無路賊至五郎江口必倍道以奪華陽  
卡隘請於華陽設一大營鄉勇潛伏夾溝山中  
迨追賊入山伏勇齊起使其奔突無門所言山  
形地勢迥不符合查終南萬山綿亘惟興漢大  
路濱江兩岸畧有平崗其餘皆峻嶺高山路徑

叢雜由五郎江口西南有四五路可達華陽各  
路里數自三百二十里至三百七八十里不  
等途中所經地方如洵陽壩五郎關兩河金水  
河毛坪三河口大河壩老坑溝楊莊腰竹嶺四  
畝地焦溪秧田壩女兒壩九尺壩姚窩子等處  
皆係四通八達之地每處又各有路七八條是  
江口至華陽一帶道路不可勝計並非左右全



無路逕而且南注漢江大河如觀音河五郎河  
金水酉水楊莊河皆在此一帶地方溪澗不下  
百餘支分派別處處俱有山溝亦非兩山夾峙  
之中祇有此溝一道此臣那彥成台布身親經  
歷察看地方形勢所有扼險設伏之處無從辦  
理應毋庸議又嚴守漢興通川要隘遏賊入陝  
之路一欵據稱要隘地方西鄉三處平利三處

各駐兵勇二三千名南鄭寧羌紫陽安康各一處各駐兵丁一二千名即可堵塞川賊斷無入陝之虞查漢中興安南岸地方山嶺層疊與川省相連大嶺皆謂之界嶺通往路徑極多西鄉西南兩面皆與通江太平接壤西面石鼓溪至甘雲溪要隘七處北面白楊關至大黃壩要隘十一處均係賊匪熟徑摺內指出西鄉地方挂

漏甚多且所稱長嶺在九元關之北繩渡壩在  
滾龍坡之北距川境尙有一百數十里尤非扼  
要總路至平利有兩扇門洞賓口中茅壩二郎  
坪等處安康有茨蓬溝滄水河等處紫陽有土  
地嶺三州壩陡嘴子等處南鄭有哨風樓花石  
梁官倉坪等處寧羌有石壩寨上馬磴等處俱  
係通川要隘在原摺指出地方之外其餘兩省

犬牙相錯之地賊匪時時出沒經

臣

松筠及德

楞泰節次奏過地名並據王文雄柯藩慶溥文  
需溫承惠呈報賊竄處所不能悉數勢難各隘  
悉設重兵杜其入陝之路惟當飭令該提鎮道  
員等認真截擊與川省官兵合剿若能截住事  
竣後卽係伊等之功倘有蔓延亦惟伊等是問  
如此各有責成亦不必逐處留防徒分兵力所

奏應毋庸議再從九品揭琮所奏清查教匪逆  
產暨逃亡無著之業事竣後分撥入伍鄉勇屯

種奉

旨飭交查辦並令撥給難民以資生計查陝省賊匪  
俱係由川楚竄入多非本地著籍之人恐無應  
查之產至南山內居民多係搭蓋板房開山墾  
種包穀資產極爲貧薄賊至間有逃亡賊過仍

冬復業亦少無著之迹容俟辦理善後事宜時  
再會同額勒登保松筠等詳查酌辦奏入報

聞

同日

上命軍機大臣傳諭額勒登保那彥成德楞額泰魁倫  
松筠台布曰各路軍營剿辦教匪先後已及四年  
自嘉慶三年以前帶兵諸臣遷延貽誤姑不具論

本年朕親政後迄今又閱一載而各路剿賊之事  
平心而論不過剿除十分之四五其餘各股竄匪  
仍在輾轉奔逃辦理迄無把握此等教匪不過烏  
合亂民各路帶兵大員俱係受恩深重所帶各項  
官兵不爲不多糜費帑項亦不可勝計並因從前  
軍營大員彼此觀望惟以諛詞掩飾日久無功如  
勒保明亮永保等俱經拏問解京並另授經畧特

派大臣前往督辦伊等節次奏到籌辦事宜自不  
致仍前欺飾尙屬可信但事閱一年仍無起色伊  
等或有實在難辦之處前曾降旨詢問未據覆奏  
朕既不能深知其故卽軍機大臣等亦無從悉其  
實在情形似此口復一口賊匪何時得平軍務何  
時告戢剿捕一事日久未得要領其中必有受病  
根由自應據實陳明方可設法籌辦譬如良醫治



病亦須望問問切洞悉病源始能對症施藥若不  
將病症先行問明卽良醫亦爲束手倘藥不對症  
非徒不能愈疾而且耽延時日受病益深此時軍  
務情形實類於此特此再行通諭額勒登保等務  
須將伊等剿捕賊匪有何實在爲難及伊等在君  
上之前不敢陳奏者亦不妨直陳無隱不可稍有  
含糊朕酌量機宜隨時指示倘經此番諄切詢

問而伊等仍不和盤托出遷延時日愈辦愈拙則  
是自取重譴斷不能再爲曲貸矣試思各路軍營  
以如許兵力帑項剿此內地亂民何至一籌莫展  
且額勒登保係朕因勒保辦理不善特授經畧今  
仍未見調度得宜而那彥成又係特經派往督辦  
大臣到陝後並未能殺賊奏功惟以深入老林爲  
詞實則未能躡蹤追剿所辦與明亮等又有何異

似此更換之帶兵大員豈不爲明亮等所笑並竊  
議朕之用人不當乎是以明亮等現在解到朕尙  
未令廷臣詰訊設伊等以現在更換之經畧大臣  
等亦並未能剿辦賊匪諉卸其罪將何以折服其  
心耶此時統兵大臣亦無可另行簡派之人焉有  
此等么磨小醜尙待朕親征之理額勒登保那彥  
成等惟當知愧知奮上緊剿辦務於三月以前悉

數辦竣方可保全若仍事玩延則是伊等竟甘蹈  
勒保等覆轍雖國家用人之道斷無甫經逮問旋  
加任用之理但額勒登保那彥成等若竟全不足  
恃又不將難辦實情詳悉具奏朕亦無可如何祇  
得將明亮勒保等釋放復令前赴軍營辦理軍務  
將額勒登保那彥成等解京治罪爲此不得已之  
舉矣

三十日癸丑松筠奏言查前此額勒登保在廣元

南江德楞泰在西鄉太平剿截各股賊匪彼時  
那彥成如將張漢潮餘匪殲淨即可移師會剿  
不料張逆餘匪以老林爲藏身之固四處奔逃  
官兵輾轉追逐稽延時日嗣額勒登保追賊至  
巴州德楞泰追賊至東鄉開縣而賊匪匿於川  
陝交界老林者尙有多股僅有王文雄數千兵

勇往來截堵賊匪由川界老林潛行砍樹開路  
翻潘家山至城固之盤壩遂入南鄭境內賊數  
約及萬人南鄭各邊卡內外受敵兵勇不能支  
持通江賊匪二三千人亦乘勢衝入花石梁卡  
隘與前股相應既而前股之賊又分兩股一向  
西趨一以牽制王文雄之兵後股賊匪踵至王  
文雄介於兩股賊匪之間濱江扼要遏其竄入

褒城棧道之路不能緊追前股賊匪遂由沔縣  
之埠川寬川一帶竄入畧陽境內其意欲繞至  
嘉陵江上游水淺處所關入甘境賴畧陽攔馬  
牆鄉勇固守岩卡賊匪遂向麻柳鋪奔逃

臣飛

催總兵吉蘭泰由鳳縣捷徑趕至嶽縣漁關臨  
水拒險與道員瑞亨聯絡聲勢使賊匪不敢躡  
淺過嘉陵江並催總兵索費英阿由褒城大道

趕緊前來惟是漢江淺涸處處可涉僅有遊擊  
崔德恒帶兵五百名遊擊伊星阿等帶兵四百  
餘名因派道員文鼎帶領鄉勇駐防長寨以顧  
南鄭江岸臣卽馳赴畧陽之八渡山堵禦途次

沔縣適據探報賊匪一股約有三四千人沿途  
焚掠各卡鄉勇均不能截堵勢甚鴟張已由埠  
川逼近官莊距沔縣城僅三十餘里勢欲躡漢



渡江臣督飭副將韓加業遊擊伊星阿等帶領

現有兵勇九百餘名擇要截擊適索費英阿前  
隊兵丁趕到卽令其隨後繼進若能將此股賊  
匪擊退再視何處緊急相機堵剿伏念川匪各  
股紛入陝境僅恃王文雄一路兵勇顧此失彼  
索費英阿吉蘭泰所帶官兵亦單陝甘兩處道  
路紛歧所備之處甚多防堵尙恐不敷更難期

其剽除賊匪卽或漁關防堵嚴密不能深入而  
畧陽之黑河等處翻山卽通棧道仍可東入南  
山西入甘省臣現飛咨額勒登保德楞泰那彥  
成等迅速派撥鎮將前來援剿庶幾不至蔓延

臣惟有儘現有兵勇竭力堵截不敢稍爲鬆勁

松筠又奏言查嘉慶元年川楚教匪起事陝省  
興安所屬之安康紫陽亦有安嶺將軍山大小

米汝五作雲光頭山五處賊匪與爲響應經宜  
綿秦承恩等督率鎮將分投剿滅興安未受蹂  
躪漢中更爲寧貼嗣因陝甘之兵全數入川剿  
賊二年五月湖北各股賊匪由河南入陝遂至  
四川與川匪會合此後往來滋擾興安漢中二  
府及商州一州五郡孝義二廳遂無寧宇而西  
安所屬逼近南山之各州縣亦間受其害然賊

所經過地方不過一路賊去即可復業買賣耕  
種仍可如常其有被賊兩三次或四五次者受  
害尤甚而田地終不至荒蕪以有官兵追趕賊  
匪不能常聚一處淹留數日未至失時尙無大  
患惟因賊匪未平餉銀未足不能遵照成例普  
加賑恤而地方官或開設粥廠或分給包穀或  
散給銀錢均隨時量爲接濟臣自抵陝以來每

出巡閱所過村莊詢問疾苦其易於接濟者卽捐廉分賞被賊較重處所當交地方官量爲撫恤如留壩鳳縣褒城南鄭等處情形較苦經

臣

商同馬慧裕派委鳳邠道王文湧漢興道文濡携帶銀兩親往安撫酌爲散給若西鄉平利因邊界遼濶兵勇不能遍守南界居民避賊入寨多有耕種失時之處亦經糴買包穀查明被賊

人戶量爲散給以資接濟連年夏秋之間收成  
尙屬豐稔其窮者挖濠築寨可以傭工轉送軍  
糧軍火可以充夫精壯者守城守卡充當鄉勇  
皆可稍得餬口是以百姓雖有奔走轉徙之勞  
而無溝壑死亡之慘此陝省地方之實在情形  
也惟是棧道一帶往來必經觀瞻所係誠不可  
不急爲緩輯祇以賊氛未靖去來無常焚燒房

屋有力者亦不敢卽行修理遷移人戶一時或  
未敢遽回寄居客民多携眷回籍往來商賈或  
裹足不前較之昔日情形自不相侔必須將房  
價等項全行給傾大爲賑恤方可望其改觀至  
本年春徵錢糧等項業蒙

恩旨分別蠲緩秋徵錢糧

臣

業已檄飭被賊近賊各

州縣聽百姓自行輸納毋許催科俟至明春查

明實欠在民請

旨加恩既可免追呼之煩亦並絕侵蝕之弊均奏入  
上命軍機大臣傳諭松筠曰陝省各股竄匪輾轉奔  
突朕原望那彥成將張逆餘匪速行剿盡即可移  
師合擊不料那彥成惟事入林追捕稽延時日而  
川陝交界老林藏匿之賊又復乘間至沔縣一帶  
肆行焚掠此皆由那彥成辦理不善所致王文雄



又復堵禦不嚴以致賊匪分股奔竄將入甘境本  
應治以踈縱之罪姑念王文雄所帶兵勇本屬無  
多且平日尙屬黽勉現又患吐血病症是以暫行  
寬宥松筠可將此旨傳諭王文雄令其倍加奮勉  
協同悉力堵剿務將此等竄匪速行剿盡或截回  
川省以期立功自贖倘再有踈縱貽誤必將王文  
雄按律治罪至現在陝境賊多兵少應行防堵之

處甚多松筠已飛咨德楞泰等速來援剿現已降  
旨諭令德楞泰速赴陝境與松筠併力合擊並著  
松筠傳諭吉蘭泰索費英阿一併帶兵會同堵剿  
務將此股竄匪擊退勿令乘虛肆擾爲要松筠等  
若能將此股竄匪遠行剿盡固屬甚善否則仍將  
賊匪截回川北不至深入甘境亦屬伊等之功至  
陝省被賊滋擾地方早經降旨令該督詳查應如

何接濟之處據實具奏應俟查奏到日再行酌量  
加恩

上又命軍機大臣傳諭德楞泰曰前因川省賊匪竄  
入西鄉勢將直趨徽縣已降旨令德楞泰帶兵迅  
赴該處趕緊剿捕今松筠奏賊匪由沔縣一帶竄  
至畧陽境內意欲繞至嘉陵江上游闖入甘境是  
已竄近甘省地界雖經松筠在彼堵剿但該處兵

力較單而那彥成相距較遠緩不濟急且那彥成  
究係書生不若德楞泰之熟練軍務帶兵勇往計  
德楞泰接奉前旨此時自己前赴徽縣一帶著再  
傳諭德楞泰體察情形如伊從前所剿雲陽等處  
賊匪股數尙多或將伊所帶將弁兵丁酌量多留  
一二千名在彼剿辦德楞泰卽酌帶兵丁速赴畧  
陽加以松筠原帶之兵協力剿辦以期殄盡賊蹤

如雲陽等處賊匪本屬無多且有額勒登保在太  
平東鄉一帶就近可以兼顧德楞泰即可稍留六  
力移會額勒登保聽其指撥調度德楞泰將所帶  
征兵速赴畧陽協剿自更得力至德楞泰到後如  
能將此股賊匪會同松筠全數殲除淨盡固屬甚  
善否則亦必將畧陽滋擾之賊兜逼回至川北與  
額勒登保併力夾擊斷不可在後尾追驅賊入甘

或又折回川南致完善之區又遭蹂躪總在德楞  
泰隨時隨地斟酌情形相機剿辦也